



KOMUNIKADO PA PRENSA

Fecha
11 februari 2016

Kolaboradó di Maneho
Corinne Leysner

Email
corinne.leysner@gmail.com

TA KOMBERTI 2 KRUSADA DI HELMIN WIELS BOULEVARD DEN 2 ROTONDE TEMPORAL

PA REDUSÍ E ÍNDISE DI AKSIDENTE KU KONSEKUENSHA FATAL

Willemstad – E dos krusadanan di Helmin Magno Wiels Boulevard (HWB), na altura di Yotin Kòrtá i na altura di Veeris, ta bira rotòndenanan temporal. E trabounan na e dos krusadanan ta kuminsá djaluna próksimo, 15 di febrüari, i ta dura seis siman na total. Ku esaki Ministerio di Tráfiko, Transporte i Planifikashon Urbano (mihó konosí komo VVRP), riba inisiativa di Minister Suzy Camelia-Römer, ta kuminsá tuma e pasonan nesesario pa yuda redusí e índise di aksidente ku konsekuensha fatal riba Kòrsou.

Adaptashon di e dos krusadanan mester sòru pa un fluho di tráfiko mas efisiente i mas sigur. Esaki ta kuadra ku e vishon di e Ministerio i Servisio pa Obranen Públiko (mihó konosí komo OW) pa tene debito kuenta ku seguridat den tráfiko den tur adaptashon i kambionan di nos infrastruktura. HWB ta un di nos kamindanan mas trafiká na Kòrsou i e kambionan den e infrastruktura ta nesesario ya ku un kantidat relativamente haltu di aksidente den tráfiko ta tuma lugá riba e karetera.

Durante e konstrukshon di e rotòndenanan temporal, e tráfiko na ámbos krusada por sigui kore nòrmal pasó no ta sera e kamindanan kompleto. E kayanan den ámbos direkshon konosé dos (2) pista i lo pèrkurá pa den e promé fase sera e pistanan parti paden i laga pafó habrí i den e di 2 fase ta sera e parti pafó di e kayanan i laga e parti paden habrí.

VVRP ke pidi tur usuario di e ruta pa sali mas trempa ku e orarionan di kustumber i tene kuenta ku eventual desviashon di e tráfiko ku ta indiká pa medio di bòrchi, ya ku e tráfiko ta bai stagna na e krusadanan ariba menshoná. Departamentu di Tráfiko di Polis, OW i e kontratista MNO Vervat ta pidi tur outomobilista pa nan kompreshon i ta gradisí di antemano pa e koperashon.

Pa mas informashon di tur e desaroyonan rondó di Minister Camelia-Römer su akshonnan por bishitá e pagina di facebook 'Minister Suzy Camelia-Romer' i pa desaroyo di e proyektonan di infrastruktura, por bishitá www.oloshiii.com.